



**Laudatio zum Abschied von Sabina Geissbühler aus dem
Grossen Rat, anlässlich der Delegiertenversammlung
SVP-Mittelland-Nord.
Im Herbst 2021**

Liebi Sabina

Schön, bisch Du hüt Abe unger üs

....nach sooo viune intensive Jahr i dr Politik

....nach über 169 Vorstöös..

....nach ere Reis, notabene uf eigeni Fuscht uf Eritrea

Du hesch säuber d Lag vor Ort wöue lere kenne

Medial het das denn grad chli Ufruer gä u isch vo grossem
Inträsse gsi

....nach der grosse Arbeit aus Presidäntin vo „Eutere gäge
Droge“

Ohni Zwifu, äs Verdienscht vo Dir Sabina, dass d Cannabis-
Legalisierig bis hüt nid Realität isch, bravo u Gratulation

....nach emene grosse u mit Lideschaft gfürte Kampf für di
Schwechschte, für d Ching

Äs Chärnalige vo dir Sabina, eventuell chöntme o Houptalige
säge

....nach grosser Arbeit gäge Harnos, hesch di dergäge
gschteut u ja, äs isch aune wo o nume haubwägs ufpasset hei
bekannt, dass du o gäge das unsägliche Französisch Lehrmittu
„Mille-Feulles“ bisch gsi

Mittlerwile hesch ja o i dere Sach Rächt übercho

....nach x angaschiert formulierte Läserbriefä i
verschiedenschte Zytige

U de chli speter mit wachem Blick: *„Di händ mer gar nid als
abdruckt was ich gschribe ha, di machet äifach was si wänd“*

....nach Afindige, sogar i dr eigete Überbouig, u o dert hesch i
mänger Aglägeheit, i viune Fäu schlussändlech Verständnis für
diner Alige gfunge

....nach viune, mängisch o grüne Alige, aber absolut sinnvoue
Aktivitäte im SVP Vorstand Chiuchlinge, auso uf
Gmeinsäbeni, hesch Aktione gstartet. Für nume es paar ds
nenne, sig hie ds Hecke pflanze, ds umwältfründleche
Hushalte, ds spile mit Naturspiuzüg, Ufforschtig,
Ungerschriftesammlig für Velowäge, etc., erwähnt

....nach hunderte vo Stunge wo du für ds recherchiere, für
astehendi Gschäft ufgwändet hesch

Du hesch ke Müei gschücht. U ei Satz liebi Sabina wird mir wahrschinglech mis läbe lang i de Ohre blibe: „*Du Walter, stell dir vor, ich ha doch so vil röscherschiert, aber di händ mir nidemal ds Telefon abgno und ich ha nachere schriftliche Afrag äifach kä Antwort übercho.....das gaht doch äifach nöd. Das find ich fräch*“

....nach viune schöne Erfouge, aber o nach viune Niederlage wo du i dire länge Zyt aus angaschierti Politikere hesch müesse härenäh

....nach auem hertä Wärche liebi Sabina

Mini Ufzeuig isch ja nume Bruchstück vo allem wo du gmacht hesch

...nach au dämm schribsch du i dim Rücktrittsschribe:

„Bin keineswegs Politmüde“ und Punkt

Wooo zum Gugger Sabina nimmsch du die Chraft här?

Nach mir (*dem Sprecher*) söusch du de nächhär ds Wort übercho, de chasch is de vilich meh über dis Rezäpt verrate

D Sabina isch i de letschte Jahr im Ratsau mi Banknachbarin gsi. Mir hi üs, mindeschtens sowit i das begriffe u gschpürt ha, sehr guet verschtange. O we mir inhaltlich mängisch zimli gägesätzlechi Meinige gha hei, äs het gfägt näbe dir Sabina

Weme de gmeint het, d Sabina tüe wi vili i däm wundervoue Auter, nume no so mit Vorhangstoffchleider desumeloufe, dä het sich de hert tüscht. S'isch vorcho das i spontan gseit ha: „Hei Sabina, bisch du hüt schön agleit“. Du hesch Freud gha u gseit: „*oohh, gfalts dir? Das freut mi und ja gäll, du achtisch halt uf so Sache*“

Natürli, das tueni itze glich no säge, ufem Phuttli vor Sabina hets de gäge Schluss vor Session mängisch meh nacheme türkische Basar usgseh aus nach öppis angerem

Ei Ussag vo dir Sabina wo du viu gmacht hesch möcht i doch nid unerwähnt la: „*Sie loset mer äifach nöd zue, si loset gar nöd, das isch sooo schlimm*“

U hiä möcht ig, u i hoffe mir aui, öppis lehrä vor Sabina:

Lehre mir wider zuelose, tüe mir üsi Ohre uf. Ei Grundsatz wo i glehrt ha:

„HÖREN – DENKEN – SPRECHEN“ u nid umkehrt

U wyter schribt d'Sabina i ihrem Rücktrittsschribe: „Ich war ein unbequemes Mädchen“, Sabina, sehr wohl hesch du o aus Grossrätin ab und zue chönne, im positive Sinn, unbequem si

Nach der Mittagspouse het Sabina de öppe pflegt ds frage: „*Du Walter, wo häsch du hüt gässe? Ich bi ga schwüme, weisch das tuet mir sooo guet*“

U das i de auermeischte Fäu mit emene fröhliche, früsche Gsicht. U ja, d'Sabina isch ja o nümme grad zwänzgi oder so, mi steu sech das vor - a d'Aare abe loufe - Badchleider montiere - schwümme - angersch alegä - abtröchne - sech schön mache für e Namittag u wider i ds Ratshus ufe, Schapo

Letschteres heist öppis angersch aus sech übere Mittag mit Wy u chüschtigem Ässe dr Buch ga vollschla -- äbe äs Vorbiud

Sabina - üse phärsönlich Ustusch wirdeni sehr vermisse

U no öppis:

Wi so mängisch im Rat, äs isch ums Gäut gange u vorauem no vor lingge Sitte, s isch drum gange dr Gäudhane unkontrolliert uftstue - i dr Früehligssession - gsehmer d'Sabina vor üs

Äs isch i dr Feschthae gsi - Du bisch uf dim Stueu Hin u Här grütscht u gäng wider u gäng flissiger zu mir übere i idringlicher Art küschelet u gmeint, *jetz gan ich das Lied vom*

Gäld ga Singe: „Wer soll das bezahlen wer hat so viel Geld, wer hat so viel Pinke, Pinke wer hat so viel Geld“

Klar, dä Uftritt Sabina, het bi vilne Chöpf für Stirnrunzele gsorget – aber du hesch di entschide für das singe – bisch ufgschtange, füre, agmäudet igschtange im Madli u hesches souverän dürezoge. Das isch Zivilcourache, Schapeau Sabina U äbe, das isch üsi Sabina Life

Sabina, i weis vo dir, dass du o ä sehr ifüehlsami, fini, sensibli Site chasch ha. Vorauem i dr letschte Session – ä Session wo für di nid grad nume schön isch gsi

I möchte hiä explizit nid uf Inhalte iga. I wünsche mir aber für di ganz fescht, dass du viu meh die positive, schöne Erläbnis u Erfahrig us dine aktive Jahr mit i politisch Ruehestand chasch mitnäh

U de no di „Quelle“, das wo DIR äbe gäng wider Chraft, Zueversicht u Muet gäh het u nes Liecht uf dim Wäg isch; di Leitspruch (von *Franz von Assisi*), wo du mir o meh weder einisch gseit hesch. Ha mi übrigens gäng sehr gfreut drüber:

„HERR GIB MIR DIE KRAFT, DINGE ZU ÄNDERN DIE ICH ÄNDERN KANN, DIE GELASSENHEIT, DAS UNABÄNDERLICHE ZU ERTRAGEN UND DIE WEISHEIT; ZWISCHEN DIESEN BEIDEN DINGEN DIE RECHTE UNTERSCHIEDUNG ZU TREFFEN.“

Warlech kluegi Wort – Wysheit

Sabina, für aus was du für üs, für üsi Gsellschaft, für d'SVP, u für üse Kanton gmacht hesch:

...für d'Schueu

...für d'Biudig

...für e Sport u d'Bewegig

...für d'Sicherheit, für ds Polizeiwäse

...für d'Drogeprävention

...für etc, etc,

Im Name vo üsere Partei Sabina: MIR DANKE DIR VO HÄRZE!

Mir wünsche dir aues Guete, o nach dire erfougriche Karriere
gäng wider schöni u beriecherndi Begägnige

Du darfsch schtouz si uf dis Gleischtete

U zum Schluss wi ig das no glehrt ha:

Eifach „Gottes riche Säge uf Dim wytere Läbeswäg“

Dr Presidänt vor SVP-Mittuland-Nord

Walter Schilt



**DEINE GROSSE ARBEIT, LIEBE
SABINA, WIRD FRÜCHTE TRAGEN!**